

Comitât – Odbor – Komitaat – Comitato 482

c/o "Informazione Friulana" soc. coop.
V. Volturno, 29 33100 Udin
Tel.: 0432 530614 Fax: 0432 530801 D.p.e.: com482@gmail.com

27 di Fevrâr: Zornade Furlane dai Dirits

Si jere intal 2004 cuant che il Comitât 482 al lançave cuntune iniziative publiche la prime Zornade Furlane dai Dirits intal inovâl di chei 27 di Fevrâr dal 1511 là che si veve impiade la faliscje de plui grande rivolte popolâr de storie dal Friûl. Un riviel che, massime intes campagnis, si moveve intal non des "leçs antighis", o sei dal rispjet des usancis e dai dirits di autoguvier rivendicâts des comunitâts furlanis. Dirits che, ancjemò in dì di vuê, si spiete di viodi rispjetâts ad in plen.

Cheste zornade, duncje, e je la ocasion par rivendicâ cun fuarce i dirits linguistics e nazionâi des comunitâts che a formin il Friûl, cu la cussience però che la lote e l'impegn par rivâ a chescj obietîfs a àn di lâ indenant ogni dì. Sul front dai dirits linguistics, magari cussì no, i problemis a son simpri chei: la maiorance dai fruts no à la pussibilitât di studiâ inte sô lenghe proprie, inte plui part des aministrazions publichis i servizis a restin dome par talian, la radiotelevision publiche no rispiete la pluralitât linguistiche che lis leçs talianis e internazionâls i domandin. Dut câs, se la lenghe e je la manifestazion plui evidente de nestre identitât 'altre' e par chest di dineâ de bande di cui che nus volarès simpri sotans, i atacs cuintri des comunitâts dal Friûl a àn cetantis musis. Si va dai disens regionâi di riforme des autonomiis che no tegnin cont de storie e de pluralitât linguistiche e identitarie de nestre tiere ae mancjance di une politiche in stât di meti lis fondis par un svilup economic autonom dal Friûl, cence dismenteâ chês 'grandis oparis' che a fasin i interès di pôcs di lôr su la piel des comunitâts locâls.

Al covente duncje savoltâ cheste logjiche di sotenance ai interès di pôcs e di centralizazion, par svicinâ plui che si pues lis decisions ae int ancje parcè che, in plui di jessi un at di democrazie, al jude a evitâ straçariis. La esperience nus insegne però che, di là des promessis efficientistis o dai discors demagogjics, i partîts e i moviments politics a Triest, compagn che a Rome, si movin daûr di altris logjichis. Par chest al è fondamentâl che il sburt al rivi des comunitâts dal Friûl no cun deleghis, ma cu la mobilitazion e cul cjapâ in man il lôr avignî. Al è plui facil di dî che no di fâ, ma no podìn plui permetisi di lassâ che a sedin altris a decidi par nô. Cjapâ cussience de nestre identitât linguistiche e nazionâl al sarès za un grant pas indenant, une vore plui grant di chel che si pense. La Zornade Furlane dai Dirits e covente ancje par chest.

Udin, ai 26 di Fevrâr dal 2014

Il quartevôs dal Comitât 482
Carli Pup